



**PRIMEIRO  
MINISTRO**

**DISKURSU SUA ESELÉNSIA PRIMEIRU-MINISTRU  
REPÚBLIKA DEMOKRÁTIKA TIMOR-LESTE,  
DR. RUI MARIA DE ARAÚJO,  
IHA BIBAN EVENTU PARALELU KONA-BA  
PIONEIRU SOSIEDADE PASÍFIKA, JUSTA NO INKLUZIVU SIRA**

**Sala ba Konferénsia sira, iha Sede Nasoens Unidas  
20 setembru 2016**



Palácio do Governo,  
Avenida Presidente Nicolau Lobato,  
Dili, Timor-Leste

Señora no Señor sira,

Onra ida mai ha'u bele partisipa iha eventua importante ida ne'e atu hodi diskuti kona-ba sociedade hirak pasifika, justa no inkluziva. Ita hasoru-malun iha ne'e tanba ita hotu empenhadu iha dezvoltimentu umanu, iha eradikasaun pobreza no promosaun pas nian.

Timor-Leste restara tiha ona ninia independensia iha 2002, hafoin okupasaun besik un kuartu sekulu. Maibe sedu liu atu ami bele konstata katal dezafiu hirak kona-ba autogovernasaun no atu hari nasaun ida hahu hosi ahi-kudesan funu nian difisil tebe-tebes hanesan mos luta ne'ebe ami hala'o hodi hetan independensia.

Hanesan ho pas barak-barak ne'ebe foin sai hosi konflitu, ami mos atravesa siklu ida kona-ba la hakmatek no violensia nian. Iha 2006 ami nia pas ahi sunu fila fali, hodi ami nia povu sira kaer hasoru malun. Ami hare progresu ne'ebe atu la'o ba dezvoltimentu sai mutuk hotu fali.

Mehi ne'ebe ami nia povu iha kona-ba independensia iha tempu neba sai hanesan buat todan ida. Klaru tebes katak sei la iha pas sustentavel bainhira la iha resposta ba problema hirak ne'ebe hamtauk sociedade no la iha progresu dezvoltimentu nian.

Ami nia sorte maka ami bele sura ho komidade internasionál nia asistensia. Nasaun sira iha mundu rai klaran mai tulun ami no sira tulun ami restaura ordem. Ami sura ho apoiou hosi misaun ida Nasoens Unidas no Forsa Internasional Estabilizasaun nian iha 2006.

Maski nune'e, atu hametin pas ita presija rezolve konflitu no tensaun hirak subjesente iha ami nia sociedade. Ami presija fo liman-ba-malun hanesan nasaun no hakilar 'to'o ona'.

Ita hotu hatene katak Ajenda 2030 nia estabese mos-mos hela katak "sei la possivel atu mosu dezvoltimentu sustentavel bainhira la iha pas no pas bainhira la iha dezvoltimentu sustentavel." Ajenda 2030 nian apela atu ita servisu hamutuk hodi hari sociedade pasifiku, justu no inkluzivu, hodi bele hatan ba elementu hirak ne'ebe hamosu violensia, instabilidade no injustisa, no atu haka'as-an liu tan hodi bele rezolve no hases-an hosi konflitu sira.

Timor-Leste la fo ulun atu pas, justisa no instituisaun inkluzivu sira bele hola parte iha ajenda dezvoltimentu ba 2030, tanba ami hatene ona liu hosi esperiensia rasik kona-ba ninia importansia. Ema hirak ne'ebe assiste ona konflitu, hanesan timor-oan sira, hakarak atu moris iha mundu ida ne'ebe sira nia oan sira la bele hetan ameasa hosi violensia no sira bele fiar katak sira nia instituisaun governamental sira justu no inkluzivu no bele proteje sira.

Pas, justisa no inkluziun la temi deit iha Objektivu 16, maibe mos integra iha Ajenda tomak. Ezemplu, objektivu hirak seluk iha meta hirak relasiona ho atu remata violensia hasoru feto, promosaun kultura ida kona-ba pas iha ita nia eskola sira no atu remata ho trafiku. Ita mos iha meta hirak ne'ebe hakarak hari aliserse ba sociedade ida pasifiku, iha area hirak hanesan emprego, dezigualdade no reziliensia bainhira iha konflitu nia laran.

Señora no Señor sira,

Sosiedade ida pasífiku ne'e la signifika deit katak la iha konfliktu. Atui ta bele hetan dezenvolvimentu sustentável ita presija harí sosiedade hirak justu no inkluzivu. Ita presija harí instituisaun estatal hirak ne'ebé bele garante justisa, seguransa, edukasaun no saúde. Ita presija boa-governasaun atu bele asegura transparénsia no responsabilizasaun no atu bele hamoris konfiansa iha Estadu nia sorin-sorin.

Iha Timor-Leste ami hatene katak ami presija reforsa ami nia instituisaun sira hodi ami bele hetan ami nia objektivu sira iha nível dezenvolvimentu. Ba ida ne'e, ha'u nia Governu halolon ona reforma sira iha área fundamental oin-oin, inklui fiskal, administrasaun públika, legislativa no setor justisa.

Ho reforma fiskal maka Ministériu Finanzas hakarak atu reforma ami nia sistema tributáriu hodi bele inklui medida hirak ne'ebe bele kria insentivu sira ba setor privadu hodi bele forma no kontrata klosan sira. Empreza sira bele hetan regalia fiskál sira iha área ida ne'e. Tanba liu sorin balun populasaun Timor nian maka ho otas ki'ik liu tinan 24, reforma ida ne'e sei ajuda atu garante ami nia klosan sira bele hetan asesu ba postu traballu ne'ebé permite sira bele sai membru produtivu sosiedade nian.

Ami oras ne'e halo hela reforma ba ami nia sector públiku atu halao nia sai efetivu liu tan no bele hatan ba nesesidade ami nia sidadaun nian sira. Ami hala'o ona diagnóstiku ida iha kada ami nia ministériu ida, ne'ebé oras ne'e dezenvolve hela estratéjia no planu asaun nian sira atu implementa rekomendasaun sira.

Ho reforma lejislativa no setor justisa nian ami hakarak atu hadi'a sai di'ak liu tan asesu sidadaun sira nian ba justisa. Ida ne'e inklui ita hateke ba justisa kostumeiru hanesan mekanizmu ida ne'ebé bele uza hamutuk ho justisa formal. Justisa tradisionál maka etapa da-uluk iha rezolve disputa sira ba maiór parte hosi ami nia populasaun, liu-liu ba sidadaun sira ne'ebé horik iha área hirak dook hosi sidade no rural sira.

Importante mos atu comunidade internasionál servisu hamutuk hodi bele apoia país hirak ho kondisaun hanesan ho ami nian. Iha era globalizasaun ida ne'e, ne'ebé ema bele hakut-liu fronteira sira no ho krime no konfliktu transnasionál sira, maka la iha Estadu ida maka bele izola-an no barak hosi sira hasoru dezafiu hanesan.

Ita nia laran sente taridu bainhira ita haré katak deziguldade hetok aumenta, la'os deit iha nasaun sira nia laran maibé mos entre nasaun ho nasaun. Ema la fahe ba malun benefísiu kreximentu ekonómiku sira, no ita haré priviléjiu no riku-soin sira soe abut iha sira nia interese rasik.

Inisiativa hosi pioneiru sira ba sosiedade pasífiku, justa no inkluzivu – ne'ebé halo ita ohin hasoru-malun – inside iha implementasaun. Ami buka forma atu aselera implementasaun ba inisiativa sira hodi lori pás, justisa no reforsu institusionál ba oin. Ami to'o oras ne'e halo servisu iha área hirak ne'e, maibé inisiativa ida ne'e hanesan oportunidade ida atu aselera ninia ezekusaun, hakle'an tan kestaun sira no halo atu sasan sira bele mosu.

Ami satisfoitu tebes tanba bele hola parte iha inisiativa ida ne'e, bainhira ida ne'e bele permite ami atu fahe esperiénsia sira hosi Timor-Leste no atu hetan diskusaun ida franku kona-ba ami nia dezafiu sira. Inisiativa ida ne'e liga ho klibur profisionál oin-oin: saúde pública ba prevensaun violénsia, justisa kriminal, lideransa polítika atu halakon konfliktu sira, sst. Bele sai mos oportunidade ida atui ta bele koalia kona-ba kestaun hirak global hanesan tráfikú no krime organizadu, ne'ebé labele hetan kontrolu hosi país hirak ne'ebé servisu ho forma izoladu. Parseiria ida ne'e signifika mos rekoñesimentu katak pás, justisa no inkluziun maka sai relevante ba país hotu-hotu, la haré ba ninia nível desenvolvimentu – ha'u laran kman bainhira haré, hanesan ezemplu, Brasil no Suíça fahe malun sira nia esperiénsia rasik.

Ami hein katak ami bele nafatin hola parte iha inisiativa hosi pioneiru sira nian ida ne'e no atu kria parseiria ida klean liu tan hodi lori ba oin pás, justisa no instituisaun inkluzivu sira atu bele serbí sidadaun sira iha país hotu-hotu namkari iha mundu rai klaran.

Obrigadu barak.

Díli, 20 setembru 2016  
Dr. Rui Maria de Araújo